

PERJANJIAN PENYEWAAN

RUANG BANGUNAN

PERJANJIAN : SEWA RUANG BANGUNAN
– RUJ FAIL: RAC.800-2

TEMPOH PERJANJIAN : **1 OGOS 2017 – 31 JULAI 2020**

TUJUAN PENYEWAAN :

DI ANTARA : **PERBADANAN ASET KERETAPI**

DAN

WANG DEPOSIT : RM 300.00 (1 BULAN SEWA)

WANG PENDAHULUAN : RM 300.00 (2 BULAN SEWA)

KADAR SEWA : RM 75.00 SEBULAN

LOKASI :

PERJANJIAN PENYEWAAN RUANG BANGUNAN

PERJANJIAN INI diperbuat padahari bulan 20.....

DI ANTARA

PERBADANAN ASET KERETAPI sebuah badan berkanun persekutuan yang ditubuhkan di bawah Akta Keretapi 1991 [Akta 463] yang beralamat di **LEVEL 16, IOI CITY TOWER 2, LEBUH IRC IOI RESORT CITY, 62502 PUTRAJAYA, SEPANG, SELANGOR** (kemudian daripada ini disebut sebagai "**Tuan Tanah**") pada satu pihak;

DAN

Pihak yang mana nama dan butirannya dinyatakan dalam **Seksyen 1 Jadual Pertama** (kemudian dari ini disebut sebagai "**Penyewa**" di pihak yang lain).

Tuan Tanah dan Penyewa akan dirujuk secara individu sebagai "Pihak" atau secara kolektif sebagai "kedua-dua pihak".

BAHAWASANYA:-

- A. Tuan Tanah ialah tuan punya berdaftar di atas bangunan di kawasan seperti yang dinyatakan di **Seksyen 2 Jadual Pertama** (kemudian daripada ini disebut sebagai "**Bangunan Tersebut**") yang terletak di atas sekeping tanah yang diperihalkan sebagai ruangan (kemudian daripada ini disebut sebagai "**Tanah Tersebut**") tersebut.
- B. Tuan Tanah telah bersetuju bagi tujuan Perjanjian ini memperuntukkan sewa ruang Bangunan Tersebut dengan keluasan seperti yang dinyatakan dalam **Seksyen 3 Jadual Pertama** (kemudian dari ini disebut sebagai "**Premis Demis**") kepada Penyewa dan Penyewa telah bersetuju menerima sewaan tersebut tertakluk kepada syarat-syarat Perjanjian ini dan sepertimana Surat Tawaran dan Setuju Terima di **Lampiran 1**.

MAKA DENGAN INI kedua-dua pihak bersetuju dengan syarat-syarat berikut:

KLAUSA 1 **DEFINISI/TAFSIRAN**

1.1. DEFINISI

Dalam Perjanjian ini, melainkan konteksnya menghendaki maksud yang lain, di mana-mana terdapat ungkapan-ungkapan di bawah ianya memberi maksud seperti yang berikut:

'Bangunan Tersebut' maksudnya bangunan yang dibina di atas Tanah Tersebut seperti yang diperihalkan di dalam pelan di **Lampiran 2**;

'Premis Demis'	maksudnya sebahagian ruang di dalam Bangunan Tersebut dengan keluasan seperti yang dinyatakan dalam Seksyen 3 Jadual Pertama dan dengan lebih tepat lagi seperti yang ditandakan merah di Lampiran 2 yang telah dikhaskan untuk tujuan mengendalikan perkhidmatan perniagaan seperti yang dinyatakan dalam Seksyen 4 Jadual Pertama semata-mata dan tiada lain daripada ini termasuklah segala kelengkapan-kelengkapan dan pemasangan-pemasangan yang telah sedia ada di dalam ruang tersebut semasa penyerahan dibuat;
'Tuan Tanah'	maksudnya Perbadanan Aset Keretapi, suatu Badan Berkanun yang telah ditubuhkan di bawah Akta Keretapi 1991 (Akta 463) dan di mana berkenaan, wakil-wakil yang dilantik oleh Tuan Tanah.

1.2. **TAFSIRAN**

- 1.2.1 Tajuk-tajuk dan tajuk-tajuk kecil kepada klausa-klausa dan bahagian-bahagian di dalam Perjanjian ini dimasukkan bertujuan untuk memudahkan sahaja dan tidak boleh diambil kira sebagai sebahagian daripada Perjanjian atau untuk dibuat pertimbangan dalam mentafsirkan Perjanjian ini.
- 1.2.2 Surat Setuju Terima bernombor rujukan seperti yang dinyatakan di **Seksyen 5 Jadual Pertama** yang bertarikh seperti yang dinyatakan di **Seksyen 6 Jadual Pertama** yang dikeluarkan oleh Tuan Tanah dan diakui terima oleh Penyewa seperti di **Lampiran 1** hendaklah dibaca dan ditafsirkan sebahagian daripada Perjanjian ini.
- 1.2.3 Rujukan kepada mana-mana statut atau peruntukan statutori adalah merangkumi rujukan-rujukan kepada statut atau peruntukan statutori yang dipinda dan digubal semula.
- 1.2.4 Rujukan kepada lampiran, klausa, subklausa atau jadual adalah rujukan kepada lampiran, klausa, subklausa atau jadual dalam Perjanjian ini.

KLAUSA 2 **PREMIS DEMIS TERSEBUT DAN BANGUNAN TERSEBUT**

- 2.1. Tuan Tanah adalah tuan punya berdaftar yang sah bagi Premis Demis dan Bangunan Tersebut.

KLAUSA 3 **PERJANJIAN PENYEWAAN**

3.1. **PERJANJIAN PENYEWAAN**

Tuan Tanah bersetuju untuk menyewakan Premis Demis dan Penyewa yang telah menjalankan pemeriksaan ke atas Premis Demis itu bersetuju untuk mengambil

Premis Demis itu secara sewaan mengikut terma-terma dan syarat-syarat yang terkandung dalam Perjanjian ini.

3.2. **TEMPOH PENYEWAAN**

Tertakluk kepada terma-terma dan syarat-syarat yang terkandung kemudian daripada ini, **TUAN TANAH** dengan ini memberi sewaan dan **Penyewa** dengan ini menerima sewaan Premis Demis bagi tempoh seperti yang dinyatakan dalam **Seksyen 7 Jadual Pertama**.

3.3. **PERLANJUTAN PENYEWAAN**

- 3.3.1. Atas permintaan bertulis daripada Penyewa yang dibuat tidak kurang daripada **enam (6) bulan** sebelum tamatnya tempoh penyewaan ini, Tuan Tanah bolehlah melanjutkan Perjanjian ini dengan syarat sentiasanya bahawa Penyewa telah membayar kesemua sewa bulanan, mematuhi dan melaksanakan kesemua obligasi, waad serta syarat dalam Perjanjian untuk suatu tempoh masa yang akan dipersetujui di antara Tuan Tanah dan Penyewa dengan sewa yang akan dipersetujui oleh kedua-dua pihak dan tertakluk kepada peruntukan-peruntukan dan syarat-syarat sebagaimana yang terkandung dalam Perjanjian ini.
- 3.3.2. Kelulusan untuk melanjutkan tempoh Perjanjian seperimana dinyatakan di klaus 3.3.1 adalah tertakluk kepada budi bicara Tuan Tanah.
- 3.3.3. Bagi mengelakkan sebarang kekeliruan, perlanjutan penyewaan oleh Tuan Tanah adalah tertakluk kepada kenaikan kadar sewaan sebanyak **lima belas (15) peratus** daripada kadar sewaan di bawah Perjanjian ini atau apa-apa kadar lain yang ditetapkan oleh Tuan Tanah.

3.4. **WANG PENDAHULUAN DAN SEWA BULANAN**

- 3.4.1. Penyewa bersetuju membayar kepada Tuan Tanah wang pendahuluan yang berjumlah seperti yang dinyatakan dalam **Seksyen 8 (a) Jadual Pertama** (kemudian daripada ini disebut sebagai “**Wang Pendahuluan**”) dan sewa bulanan yang berjumlah seperti yang dinyatakan dalam **Seksyen 8 (b) Jadual Pertama** (kemudian daripada ini disebut sebagai “**Sewa Bulanan**”). **Wang Pendahuluan** dan **Sewa Bulanan** hendaklah dibayar melalui Wang Kiriman Pos/Bank Deraf/Cek atas nama Perbadanan Aset Keretapi atau melalui kaedah-kaedah pembayaran lain yang dipersetujui oleh Tuan Tanah. Sewa Bulanan dan/atau mana-mana amaun yang perlu dibayar kepada Tuan Tanah dibawah Perjanjian ini adalah tidak termasuk bayaran cukai jualan dan/atau cukai perkhidmatan di bawah undang-undang cukai yang berkuatkuasa yang dikenakan oleh pihak berkuasa pada kadar yang ditetapkan.
- 3.4.2. Sewa Bulanan hendaklah dibuat pada tarikh seperti yang dinyatakan dalam **Seksyen 9 Jadual Pertama** dan bayaran sewa bulanan seterusnya hendaklah dibuat sebelum atau pada tujuh (7) haribulan tiap-tiap bulan.

- 3.4.3. Kadar sewa bulanan adalah sentiasa tertakluk kepada penilaian semasa yang akan dikaji semula setiap tempoh satu (1) tahun, jika difikirkan perlu oleh Tuan Tanah.
- 3.4.4. Tertakluk kepada terma-terma dan syarat-syarat yang terkandung kemudian daripada ini, sekiranya Penyewa masih menduduki Premis Demis selepas tamat tempoh penyewaan sepertimana yang dinyatakan dalam **Seksyen 7 Jadual Pertama** atau melalui prosedur penamatan penyewaan sepertimana yang dinyatakan di bawah Perjanjian ini, Penyewa bersetuju untuk membayar kepada Tuan Tanah sejumlah wang sepertimana yang dinyatakan dalam **Seksyen 8 Jadual Pertama** secara bulanan sepanjang tempoh Penyewa menduduki Premis Demis.

KLAUSA 4 **WANG DEPOSIT**

- 4.1. Penyewa hendaklah pada tarikh Perjanjian ini ditandatangani menyerahkan wang cagaran sewa Premis Demis sejumlah seperti yang dinyatakan dalam **Seksyen 10 Jadual Pertama** yang bersamaan satu (1) bulan kadar sewaan Premis Demis (kemudian dari ini disebut sebagai "**Wang Deposit**") dalam bentuk wang pos/bank draf/cek atas nama Perbadanan Aset Keretapi atau melalui kaedah-kaedah pembayaran lain yang dipersetujui oleh Tuan Tanah; dan
- 4.2. Wang Deposit tersebut hendaklah dikembalikan semula kepada Penyewa apabila tamatnya Perjanjian ini, tanpa apa-apa obligasi di pihak Tuan Tanah untuk melaburkan wang tersebut dan memberi faedah atasnya. Tuan Tanah mempunyai hak, selain daripada remedi-remedi lain yang diperuntukkan kepadanya melalui Perjanjian ini, merampas atau memotong apa-apa jumlah Wang Deposit atau kesemua jumlah Wang Deposit seandainya berlaku perlanggaran syarat-syarat dan terma-terma Perjanjian ini dan amaran bertulis tentang perkara tersebut dan arahan untuk memperbetulkannya telah dikeluarkan kepada Penyewa dan Penyewa masih gagal, cuai atau sengaja meneruskan perlanggaran syarat-syarat atau terma-terma Perjanjian ini.

KLAUSA 5 **HAK PENJUALAN**

- 5.1. Bagi tujuan ini, Penyewa hendaklah memastikan segala undang-undang semasa tentang perniagaan seperti yang dinyatakan dalam **Seksyen 4 Jadual Pertama** dipatuhi dengan tepat.
- 5.2. Kesemua permohonan bagi mendapatkan lesen, permit, pendaftaran (termasuk nama perniagaan) adalah di atas perbelanjaan Penyewa sendiri termasuk namun tidak terhad keizinan-keizinan lain yang perlu sebagaimana dikehendaki oleh Kerajaan sebelum menjalankan perniagaan dibenarkan.

KLAUSA 6
WAAD OLEH PENYEWA

6.1. Maka Penyewa dengan ini berwaad dengan Tuan Tanah seperti berikut:

- (a) akan membayar Sewa Bulanan yang ditetapkan pada masa dan mengikut cara seperti yang dinyatakan dalam Perjanjian ini;
- (b) akan menerima dan mengambil posisi Premis Demis itu dalam keadaan seperti sedia ada sepetimana diperihalkan dalam **Lampiran 2**;
- (c) akan bertanggungjawab untuk bekerjasama dengan pihak pembekal yang berkenaan bagi membekalkan kemudahan elektrik, air, telefon serta pemasangannya ke Premis Demis itu dan akan membayar deposit bagi pembekalan kemudahan-kemudahan tersebut dan kemudahan lain serta membayar caj penggunaan kemudahan-kemudahan tersebut sepanjang tempoh penyewaan atau apa-apa lanjutan tempoh penyewaan;
- (d) Penyewa bertanggungjawab menguruskan sendiri segala pembayaran kadar cukai tanah, cukai taksiran, yuran, lesen serta bayaran-bayaran lain yang akan dikenakan oleh Pihak Berkuasa Tempatan atau lain-lain agensi yang berkaitan dan Tuan Tanah tidak bertanggungjawab di atas kegagalan Penyewa mematuhi Klausa 5 di atas;
- (e) akan menggunakan Premis Demis ini sebagai ruang untuk perkhidmatan mengendalikan perniagaan seperti yang dinyatakan di **Seksyen 4 Jadual Pertama** sahaja dan tidak boleh membuat lain-lain perkhidmatan dan sebarang perubahan tujuan penyewaan dan/atau kegunaan tapak hendaklah mendapat kebenaran bertulis dari Tuan Tanah;
- (f) akan memelihara Premis Demis dan kelengkapan serta pemasangan di dalamnya supaya sentiasa berada dalam keadaan baik (susutan lazim dikecualikan);
- (g) akan membernarkan Tuan Tanah dan/atau agennya dengan atau tanpa pekerja dan dengan atau tanpa peralatan pada setiap masa yang sesuai dan setelah notis bertulis yang munasabah diberi terlebih dahulu untuk memasuki Premis Demis atau lekapan Tuan Tanah serta menjalankan kerja-kerja pembaikan struktur luaran di Premis Demis atau di mana-mana bahagian Bangunan Tersebut yang boleh menjadi sebahagian daripada Premis Demis atau mana-mana bangunan berhampiran yang sukar dimasuki melainkan dari atau melalui Premis Demis itu;
- (h) akan membernarkan Tuan Tanah dan/atau ejennya dengan atau penempatan dawai, kabel dan saluran-saluran untuk tujuan pembekalan elektrik, pemasangan sistem penyaman udara dan paip-paip untuk penyaluran air, gas, sisa sampah-sarap, najis dan juga untuk tujuan pembaikan am, pengubahan dan penggantian seluruh atau mana-mana dawai, paip, kabel

atau saluran-saluran itu pada atau melalui Premis Demis dengan syarat sentiasa bahawa Tuan Tanah hendaklah mengemukakan notis bertulis kepada Penyewa dalam tempoh tiga puluh (30) hari dari tarikh menjalankan kerja-kerja tersebut;

- (i) akan sentiasa menjaga kebersihan Premis Demis dan mempastikan tiada imbuhan kotoran, sampah-sarap atau puing-puing di dalam atau di luar kawasan Premis Demis yang boleh menimbulkan kacau ganggu kepada Tuan Tanah atau penyewa-penyewa lain. Penyewa akan sentiasa mempastikan tiada sampah-sarap, barang-barang, kotak atau lain-lain bebanan seumpamanya di pintu masuk, anak tangga, tangga kecemasan kebakaran ataupun tempat laluan Bangunan Tersebut;
- (j) akan mendapat persetujuan bertulis daripada Tuan Tanah telebih dahulu untuk meletak, melekat, atau mempamerkan papan nama, papan tanda, pelekat, poster, iklan, tiang bendera atau apa-apa benda lain di bahagian luar Premis Demis atau jendelanya atau di mana-mana bahagian Bangunan Tersebut. Jika Tuan Tanah berpendapat papan tanda, pelekat, poster, iklan atau barang yang diletak atau dipamerkan boleh merosakkan nama, reputasi atau kedudukan Bangunan Tersebut, Penyewa hendaklah memindahkan atau mengubah suai papan tanda, pelekat, poster, iklan atau barang tersebut dengan segera apabila menerima notis daripada Tuan Tanah;
- (k) akan setiap masa mematuhi semua peraturan pengurusan bangunan dan/atau arahan daripada Tuan Tanah untuk tujuan pengurusan Bangunan Tersebut dan akan mempastikan semua pekerja, ejen dan orang yang dijemput oleh Penyewa sama ada sebagai pelanggan atau sebaliknya bertindak selaras dengan peraturan Bangunan Tersebut dan/atau arahan tersebut. Tuan Tanah berhak pada bila-bila masa dan dari semasa ke semasa untuk membuat, menambah, mengubah atau menangguhkan apa-apa peraturan pengurusan bangunan dan/atau arahan berkenaan dengan Premis Demis dan/atau Bangunan Tersebut;
- (l) Semua bil-bil utiliti ke atas Premis Demis yang dipohon hendaklah diatas nama Penyewa itu sendiri dan semua kos-kos yang terlibat adalah di tanggung oleh Penyewa sepenuhnya;
- (m) akan mematuhi segala ketetapan undang-undang yang berkuat kuasa di negara ini;
- (n) akan bertanggungjawab untuk menanggung segala kerugian yang dialami oleh Tuan Tanah atas apa-apa kerosakan kepada Premis Demis ataupun untuk sesuatu yang berlaku ke atas mana-mana orang yang disebabkan oleh keingkaran dan/atau kecuaian Penyewa atau pekerjanya, ejennya ataupun pemegang lesennya akibat daripada pelanggaran syarat-syarat atau waad-waad Penyewa di bawah Perjanjian ini;

- (o) tidak akan menyerah hak atau menyewakan pula atau melepaskan milik Premis Demis itu atau mana-mana bahagiannya daripadanya kepada orang-orang lain, syarikat atau sesiapa sahaja tanpa persetujuan bertulis Tuan Tanah;
- (p) akan memastikan apa-apa senjata, peluru atau barang-barang yang menyalahi undang-undang, serbuk letupan atau lain-lain bahan letupan atau bahan mudah terbakar serta lain-lain bahan seumpamanya tidak disimpan atau dibawa masuk ke Premis Demis atau mana-mana bahagian Bangunan Tersebut;
- (q) akan memastikan tiada binatang dibawa masuk ke dalam Premis Demis atau mana-mana bahagian Bangunan Tersebut;
- (r) akan mematuhi larangan penggunaan gas atau bahan api untuk tujuan memasak di Premis Demis dan Penyewa bertanggungjawab untuk menyediakan alat pemadam api di Premis Demis tersebut;
- (s) tidak akan membuat sebarang perubahan tambahan atau pertukaran bentuk dengan apa cara sekalipun kepada Premis Demis atau mana-mana bahagian daripadanya tanpa persetujuan bertulis Tuan Tanah;
- (t) akan menguruskan sendiri untuk mendapatkan apa-apa kelulusan dari Pihak Berkuasa Tempatan (kemudian dari ini disebut sebagai "**PBT**") atau lain-lain undang-undang berkaitan untuk tujuan perkhidmatan perniagaan seperti yang dinyatakan dalam **Seksyen 4 Jadual Pertama**;
- (u) akan mematuhi semua syarat-syarat yang dikenakan oleh PBT atau lain-lain undang-undang mengenai urusan perkhidmatan perniagaan seperti yang dinyatakan dalam **Seksyen 4 Jadual Pertama**. Tuan Tanah tidak bertanggungjawab ke atas tindakan undang-undang yang diambil oleh PBT atau lain-lain agensi Kerajaan di atas kegagalan Penyewa mematuhi undang-undang;
- (v) pada bila-bila masa dalam tempoh tiga (3) bulan terakhir sebelum tamat tempoh penyewaan atau apa-apa lanjutan tempoh penyewaan, untuk membenarkan Tuan Tanah dan/atau ejennya atau mana-mana pihak yang mempunyai kebenaran daripada Tuan Tanah dan setelah notis bertulis yang munasabah diberi terlebih dahulu untuk memasuki, melihat dan memeriksa Premis Demis tersebut pada masa yang munasabah dan membenarkan Tuan Tanah atau ejennya untuk mempamerkan di mana-mana bahagian Premis Demis tersebut apa-apa notis tentang penyewaan tersebut; dan
- (w) bertanggungjawab sepenuhnya melindungi Tuan Tanah dari sebarang tindakan undang-undang atau apa-apa tuntutan pihak ketiga yang dibuat di dalam atau di luar mahkamah.

KLAUSA 7
PEMERIKSAAN PREMIS DEMIS

- 7.1. Tuan Tanah sentiasa mempunyak hak kebebasan keluar masuk bagi tujuan pemeriksaan Premis Demis pada tiap-tiap masa yang difikirkan bersesuaian.

KLAUSA 8
INSURANS

- 8.1. Penyewa hendaklah sepanjang tempoh penyewaan memastikan bahawa Premis Demis termasuk apa-apa binaan yang didirikan di atasnya mempunyai perlindungan insurans terhadap kerugian atau kerosakan akibat kebakaran, banjir, pihak ketiga atau apa-apa kerosakan sebagaimana yang diperuntukkan dalam polisi insuran dan akan membayar premium yang perlu bagi maksud itu dengan mana-mana syarikat insurans yang dipilih oleh Tuan Tanah. Penyewa hendaklah mengemukakan polisi insurans dan resit bagi premium tahun semasa kepada Tuan Tanah apabila dikehendaki oleh Tuan Tanah.
- 8.2. Adalah dengan ini dipersetujui dan diakui oleh kedua-dua pihak bahawa Tuan Tanah tidak akan bertanggungjawab atau dikenakan apa-apa polisi atau permohonan polisi insurans terhadap kerugian, kecurian atau kerosakan akibat apa-apa risiko atau bencana kepada apa-apa benda termasuk wang, barang bernilai, peralatan, perkakas dan apa-apa pemasangan dan lekapan dalam Premis Demis tersebut atau untuk apa- apa kerugian atau kerosakan yang mungkin dialami oleh Penyewa akibat daripada mana-mana perkara-perkara tersebut.
- 8.3. Penyewa hendaklah sepanjang tempoh penyewaan tidak melakukan atau membenarkan atau membiarkan berlakunya apa-apa perbuatan yang boleh mengakibatkan apa-apa polisi insurans untuk Premis Demis itu atau termasuk apa-apa binaan yang didirikan di atasnya menjadi tidak sah atau boleh dijadikan tidak sah atau di mana bayaran premium untuk polisi insurans tersebut ditambah atau dinaikkan. Penyewa hendaklah menanggung dan membayar kepada Tuan Tanah segala kerugian yang dialami oleh Tuan Tanah dan apa-apa jumlah lebihan yang dibayar oleh Tuan Tanah kerana kenaikan/tambahan premium insurans tersebut dan hendaklah menanggung dan membayar segala kerugian serta perbelanjaan Tuan Tanah dalam memperbaharui polisi insurans akibat kegagalan Penyewa mematuhi peruntukan ini tanpa prejudis kepada hak-hak lain Tuan Tanah terhadap Penyewa.
- 8.4. Dalam keadaan sekiranya akibat kerosakan, kebakaran dan banjir ke atas apa-apa binaan yang didirikan di atas Premis Demis itu di mana pampasan insurans tidak dapat dituntut atau tidak dibayar kerana sesuatu kelakuan, tindakan atau kegagalan di pihak Penyewa, maka Penyewa hendaklah bertanggungjawab seluruhnya dan menanggung sepenuhnya kerugian yang dialami oleh Tuan Tanah akibat daripada tuntutan, tindakan dan prosiding perundangan yang dimulakan oleh mana-mana pihak.

KLAUSA 9

PENAMATAN PENYEWAAN

9.1. Tuan Tanah dan Penyewa dengan ini mengikat janji seperti berikut:

9.1.1. PENAMATAN KERANA KEINGKARAN

- (a) Tuan Tanah boleh menamatkan Perjanjian ini jika:
- (i) Sewa Bulanan atau mana-mana bahagiannya yang dipersetujui dalam Perjanjian ini kena dibayar oleh Penyewa adalah tertunggak dan masih tidak dibayar pada bila-bila masa selama empat belas (14) hari selepas genap masanya kena dibayar sama ada diminta secara formal atau tidak;
 - (ii) Penyewa gagal mematuhi mana-mana terma Perjanjian ini; atau
 - (iii) Penyewa menggunakan Premis Demis tersebut untuk apa-apa tujuan yang tidak sah di sisi undang-undang atau apa-apa tujuan yang berlainan daripada yang dipersetujui oleh Tuan Tanah secara bertulis, maka dalam mana-mana hal yang berkenaan adalah sah di sisi undang-undang bagi Tuan Tanah pada bila-bila masa sesudah itu menyampaikan notis lucut hak kepada Penyewa menurut seksyen 235 Kanun Tanah Negara 1965.
- (b) Kedua-dua pihak bersetuju bahawa masa yang munasabah untuk meremedikan pelanggaran yang menjadi hal perkara notis lucut hak tersebut ialah:-
- (i) empat belas (14) hari bagi hal Penyewa tidak membayar Sewa Bulanan; dan
 - (ii) empat belas (14) hari bagi lain-lain kemungkiran terma dan syarat-syarat Perjanjian ini.
- (c) Jika sebaik sahaja habisnya tempoh yang dinyatakan dalam notis lucut hak tersebut pelanggaran yang diadukan itu tidak diremedikan, Tuan Tanah adalah bebas untuk memasuki semula Premis Demis tersebut atau mana-mana bahagiannya dan berikutan dengan itu, tamatlah Perjanjian ini dengan mutlaknya, dengan syarat sentiasa bahawa penamatkan Perjanjian ini tidak akan menyentuh hak-hak lain Penyewa yang terakru di bawah Perjanjian ini.
- (d) Segala kos dan perbelanjaan yang dikeluarkan oleh Tuan Tanah dalam menuntut perbelanjaan serta bayaran-bayaran lain termasuk kos guaman (mengikut dasar perhubungan peguam dan anak guaman) dan semua yuran guaman dan kos yang timbul hendaklah dibayar oleh Penyewa dan boleh didapatkan kembali oleh Tuan Tanah dari Penyewa sebagai satu hutang kepada Tuan Tanah.

- (e) Tiada apa-apa tindakan seperti klaus di atas akan menyentuh mana-mana hak Tuan Tanah untuk mendapatkan gantirugi ke atas sebarang kerosakan yang berlaku di sepanjang Tempoh Penyewaan.

9.1.2. **PENAMATAN OLEH TUAN TANAH**

Sekiranya Tuan Tanah memerlukan Premis Demis tersebut atau mana-mana bahagian yang berkaitan, untuk apa sebab sekalipun semasa tempoh Perjanjian ini, maka Tuan Tanah boleh menamatkan Perjanjian ini dengan memberi notis bertulis kepada Penyewa dalam tempoh tidak kurang dari tiga puluh (30) hari bagi tujuan tersebut. Sebaik sahaja tamat tempoh yang dinyatakan dalam notis tersebut, maka Perjanjian ini terhenti dan batal.

9.1.3 **PENAMATAN OLEH PENYEWA**

Sekiranya Tuan Tanah gagal mematuhi mana-mana terma dan syarat-syarat Perjanjian ini, maka Penyewa berhak menamatkan Perjanjian ini dengan memberi kepada Tuan Tanah notis bertulis untuk tujuan tersebut tiga puluh (30) hari sebelum tarikh penamatan berkuat kuasa. Sebaik sahaja tamat tempoh yang dinyatakan dalam notis tersebut, maka Perjanjian ini terhenti dan batal.

9.1.4. **PENAMATAN AM**

Tuan Tanah boleh menamatkan Perjanjian ini sekiranya Penyewa:

- (a) sebagai suatu syarikat meluluskan sesuatu ketetapan, atau mahkamah membuat suatu perintah bahawa syarikat itu digulung (yang bukannya suatu penggulungan bagi maksud penyusunan atau penyatuan), atau jika seorang penerima atau pengurus bagi pihak seorang pemutang dilantik bagi Tuan Tanah; dan
- (b) menjadi bankrap atau memberhentikan perniagaannya.

9.1.5. **PENAMATAN DENGAN NOTIS**

Mana-mana Pihak boleh, pada bila-bila masa sepanjang Tempoh Perjanjian ini dan tanpa perlu memberi apa-apa sebab, menamatkan Perjanjian ini dengan syarat sekurang-kurangnya tiga puluh (30) hari notis secara bertulis diberikan kepada Pihak yang satu lagi.

9.1.6. **PENAMATAN DEMI KEPENTINGAN NEGARA**

- (a) Walau apa pun peruntukan Perjanjian ini, Tuan Tanah boleh menamatkan Perjanjian ini dengan memberi notis tidak kurang daripada tiga puluh (30) hari kepada Penyewa, tanpa apa-apa obligasi memberikan apa-apa alasan, jika Tuan Tanah berpendapat bahawa penamatan Perjanjian ini adalah perlu bagi kepentingan negara, demi keselamatan negara, untuk kegunaan

perkeretapiian atau bagi tujuan mematuhi dasar Kerajaan Malaysia atau dasar awam.

- (b) Bagi tujuan klausa ini, maksud “kepentingan negara”, “demi keselamatan negara”, “untuk kegunaan keretapi” atau bagi tujuan mematuhi “dasar Kerajaan Malaysia” atau “dasar awam” hendaklah semata-mata ditentukan oleh Tuan Tanah dan penentuan tersebut hendaklah bagi semua hasrat dan tujuan adalah muktamad dan tidak boleh dicabar.

9.1.7. KESAN PENAMATAN

Sekiranya Perjanjian ini ditamatkan melalui klausa (9.1.1), (9.1.2), (9.1.3) (9.1.4) dan (9.1.5), maka:

- (a) Premis Demis dan/atau hak ke atas Premis Demis tersebut akan kembali atau terletakhak kepada Tuan Tanah tanpa sebarang kos dan perbelanjaan kepada Tuan Tanah;
- (b) Segala bangunan, kelengkapan-kelengkapan atau pepasangan-pepasangan pada Premis Demis tersebut yang di bina oleh Penyewa akan menjadi hakmilik Tuan Tanah dan diserahkan kembali dengan sempurna dan aman tanpa sebarang tuntutan, bayaran, pampasan, gantirugi atau apa-apapun kepada Penyewa.
- (c) Atas penamatan Perjanjian ini, maka adalah sah untuk Tuan Tanah pada bila-bila masa memasuki Premis Demis tersebut atau mana-mana bahagian yang berkaitan dan mengambil milikan atas tanah tersebut.
- (d) Penamatan Perjanjian ini di bawah klausa ini tidak menjaskan hak atau memprejudis mana-mana Pihak untuk mengambil tindakan dan menuntut pampasan atau ganti rugi mengenai apa-apa pelanggaran terma Perjanjian ini oleh Pihak yang satu lagi yang terakru sebelum penamatan Perjanjian ini dan obligasi di bawah Perjanjian ini terus berkuat kuasa walaupun selepas penamatan Perjanjian ini berhubung apa-apa tindakan, perbuatan atau perkara yang berlaku sebelum penamatan Perjanjian ini.

9.1.8. KESAN PENAMATAN DEMI KEPENTINGAN NEGARA

- (a) Sekiranya Tuan Tanah menamatkan Perjanjian ini melalui klausa 9.1.6, maka kesan penamatan dalam klausa 9.1.7 (a), (b), dan (c) akan terpakai.
- (b) Bagi mengelakkan keraguan, kedua-dua pihak dengan ini bersetuju bahawa Penyewa tidak berhak ke atas apa-apa bentuk kerugian termasuklah kehilangan keuntungan, gantirugi, tuntutan atau apa-apapun berikut daripada penamatan Perjanjian ini.

**9.1.9. PENAMATAN KERANA RASUAH, AKTIVITI-AKTIVITI YANG TIDAK SAH ATAU
MENYALAHİ UNDANG-UNDANG**

- (a) Tanpa prejidis kepada apa-apa hak lain Tuan Tanah, jika Penyewa, pengkhidmat, atau pekerjanya disabitkan oleh mahkamah atas kesalahan rasuah atau aktiviti-aktiviti yang tak sah atau menyalahi undang-undang yang berkaitan dengan Perjanjian ini atau perjanjian-perjanjian lain yang dimeterai oleh Penyewa tersebut dengan Tuan Tanah, maka Tuan Tanah berhak untuk menamatkan Perjanjian ini pada bila-bila masa dengan memberi notis bertulis dengan serta-merta kepada Penyewa bagi tujuan penamatkan Perjanjian ini.
- (b) Dengan penamatkan di bawah klaus 9.1.9 (a), Tuan Tanah berhak ke atas segala kerugian, kos-kos, ganti rugi dan perbelanjaan (termasuk apa-apa kos dan perbelanjaan sampingan) yang ditanggung oleh Tuan Tanah berikut daripada penamatkan Perjanjian ini.
- (c) Bagi mengelakkan keraguan, kedua-dua pihak dengan ini bersetuju bahawa Penyewa tidak berhak ke atas apa-apa bentuk kerugian termasuklah kehilangan keuntungan, ganti rugi, tuntutan atau apa-apapun berikutan daripada penamatkan Perjanjian ini.

**KLAUSA 10
PENYERAHAN PREMIS DEMIS**

- 10.1. Penyewa adalah bertanggungjawab untuk menyerah kembali Premis Demis dengan sempurna kepada Tuan Tanah berserta dengan kelengkapan-kelengkapan dan pemasangan-pemasangan padanya yang jika ditanggalkan akan merosakkan bangunan tersebut apabila tempoh Perjanjian ini tamat atau atau berakhirnya apa-apa lanjutan tempoh penyewaan.
- 10.2. Penyewa walau bagaimanapun, boleh memindahkan mana-mana kelengkapan atau pemasangan yang dipasang olehnya selepas menandatangani Perjanjian ini dengan syarat Penyewa menanggung segala kos yang timbul daripadanya dan menggantikan apa-apa kerosakan yang disebabkan oleh pemindahan itu.
- 10.3. Sekiranya Penyewa gagal mematuhi peruntukan Klaus 10.1 di atas, Tuan Tanah berhak di sisi undang-undang untuk mengarahkan mana-mana kontraktor untuk melaksanakan kerja-kerja tersebut dan segala kos yang dikenakan hendaklah dianggap sebagai satu hutang kepada Tuan Tanah yang boleh diperoleh oleh Tuan Tanah daripada Penyewa dengan syarat sentiasanya perkara ini tidak boleh disifatkan sebagai penepian hak Tuan Tanah sama ada dalam Perjanjian ini atau oleh undang-undang, bagi mendapatkan kembali keseluruhan atau sebahagian kos tersebut.

KLAUSA 11
FORCE MAJEURE

11.1. Tuan Tanah dan Penyewa tidak akan bertanggungjawab terhadap apa-apa kemungkinan obligasi masing-masing di bawah Perjanjian ini sekiranya Tuan Tanah atau Penyewa tidak dapat melaksanakan obligasinya di bawah Perjanjian ini (atau mana-mana bahagian daripadanya) akibat daripada berlakunya kejadian *Force Majeure*. Kejadian *Force Majeure* hendaklah bermaksud:

- (a) peperangan (sama ada ia diisyiharkan atau tidak), pertempuran, penaklukan atau tindakan oleh musuh-musuh asing;
- (b) pemberontakan, revolusi, rampasan kuasa, perang saudara atau tindakan pengganas;
- (c) bencana alam termasuk, tetapi tidak terhad kepada, gempa bumi, banjir dan kebakaran bawah tanah yang spontan, tsunami (ombak besar) atau apa-apa bencana alam yang mana, secara munasabahnya, seseorang yang berpengalaman tidak dijangka untuk mengambil langkah-langkah beringat-ingat;
- (d) letupan nuklear, pencemaran radio aktif atau bahan kimia atau radiasi;
- (e) tekanan ombak yang disebabkan oleh kapal terbang atau apa-apa peranti aerial yang bergerak dalam kelajuan sonik atau supersonik; dan
- (f) rusuhan, kekecohan atau kekacauan awam.

Walau bagaimanapun, keadaan *Force Majeure* adalah tidak termasuk kemerosotan ekonomi, dana yang tidak mencukupi, atau masalah kewangan di pihak Penyewa dalam menjalankan tanggungjawabnya di bawah Perjanjian ini.

11.2. Jika berlaku sesuatu kejadian *Force Majeure* yang menyebabkan mana-mana Pihak tidak dapat melaksanakan apa-apa obligasinya di bawah Perjanjian ini (atau mana-mana bahagian daripadanya) yang terjejas akibat daripada kejadian *Force Majeure* tersebut, Pihak itu hendaklah serta merta memaklumkan kepada Pihak yang satu lagi dan diikuti dengan mengemukakan laporan terperinci mengenai kejadian *Force Majeure* tersebut dan kesannya kepada pelaksanaan Perjanjian ini.

11.3. Jika kejadian *Force Majeure* menjadikan Premis Demis tersebut atau mana-mana bahagian daripadanya tidak layak diduduki atau digunakan untuk apa-apa tempoh, maka:

- (a) Sewa Bulanan yang dikenakan atau kadar yang patut dan adil mengikut sifat dan takat kerosakan yang berlaku (yang dalam hal pertikaian bolehlah ditentukan melalui timbang tara mengikut peruntukan klaus 13) hendaklah digantungkan dan terhenti daripada kena dibayar sehingga Premis Demis tersebut layak semula untuk diduduki dan digunakan; atau

- (b) Tempoh Penyewaan boleh ditambah tertakluk kepada persetujuan kedua-dua pihak.
- 11.4. Jika kedua-dua pihak merasakan bahawa kejadian *Force Majeure* yang berlaku itu berada di tahap yang sebegini teruk atau telah berterusan untuk suatu tempoh yang sebenarnya menggagalkan niat asal Perjanjian ini, kedua-dua pihak kepada Perjanjian ini bolehlah bersetuju bahawa Perjanjian ini boleh ditamatkan atas persetujuan bersama.
- 11.5. Jika Perjanjian ini ditamatkan akibat daripada kejadian *Force Majeure* di bawah klausa di atas, semua hak dan obligasi kedua-dua pihak di bawah Perjanjian ini hendaklah terhenti, dan kedua-dua pihak tidak boleh membuat apa-apa tuntutan terhadap Pihak yang satu lagi, dan masing-masing tidak bertanggungan terhadap satu sama lain melainkan berkaitan apa-apa hak dan liabiliti yang terakru sebelum berlakunya kejadian *Force Majeure* tersebut.
- 11.6. Kedua-dua pihak tidak berhak untuk bersandarkan kepada peruntukan-peruntukan dalam klausa ini melainkan sekiranya kedua-dua pihak telah berpuas hati bahawa kejadian *Force Majeure* benar-benar berlaku.
- 11.7. Bagi mengelakkan keraguan, kedua-dua pihak hendaklah terus melaksanakan obligasi masing-masing di bawah Perjanjian ini yang tidak terjejas, tertangguh atau terganggu oleh kejadian *Force Majeure* dan obligasi-obligasi berkenaan hendaklah, sementara menunggu pelaksanaan peruntukan klausa ini, terus berkuat kuasa.

KLAUSA 12

JAWATANKUASA PENYELESAIAN PERTIKAIAN

- 12.1. Apa-apa hal, pertikaian atau tuntutan yang timbul daripada atau berkenaan dengan Perjanjian ini hendaklah diselesaikan secara baik oleh kedua-dua pihak.
- 12.2. Jika hal, pertikaian atau tuntutan tersebut tidak dapat diselesaikan secara baik oleh kedua-dua pihak, maka kedua-dua pihak dengan persetujuan bersama boleh merujuk hal, pertikaian atau tuntutan tersebut kepada Jawatankuasa Penyelesaian Pertikaian yang dianggotai oleh:
- (i) seorang (1) wakil dari Perbadanan Aset Keretapi sebagai Pengurus bebas yang dilantik secara persetujuan bersama oleh Pihak-Pihak;
 - (ii) seorang (1) orang wakil yang dilantik daripada Penyewa; dan
 - (iii) seorang (1) wakil yang dilantik daripada Tuan Tanah.
- 12.3. Jawatankuasa Penyelesaian Pertikaian tersebut hendaklah menentukan prosedurnya sendiri. Jawatankuasa Penyelesaian Pertikaian tersebut hendaklah bermesyuarat dan berusaha sedaya upaya untuk mencapai penyelesaian yang sebaik-baiknya di atas perkara yang dirujukkan kepadanya.

- 12.4. Jika hal, pertikaian atau tuntutan yang dirujuk kepada Jawatankuasa Penyelesaian Pertikaian tersebut tidak dapat diselesaikan secara baik oleh kedua-dua pihak, maka kedua-dua pihak hendaklah merujuk hal, pertikaian atau tuntutan tersebut kepada Mahkamah yang mempunyai bidang kuasa di Malaysia.

KLAUSA 13 **LAIN-LAIN**

13.1. POSESI PREMIS DEMIS

Bila mana Penyewa mengambil posesi fizikal Premis Demis tersebut, maka ianya dianggap sebagai bukti konklusif terhadapnya bahawa Premis Demis tersebut berada dalam keadaan baik dan memuaskan pada tarikh pengambilan posesi.

13.2. KEDUDUKAN PREMIS DEMIS

Kedua-dua pihak kepada Perjanjian ini bersetuju bahawa kedudukan dan sempadan adalah seperti yang ditandakan dalam **Lampiran 2**. Keluasan Premis Demis adalah seperti yang dinyatakan dalam **Seksyen 3 Jadual Pertama** seperti yang diperihalkan dalam **Lampiran 2** adalah muktamad dan hendaklah dijadikan asas kepada pengiraan jumlah sewa yang dikenakan ke atas Premis Demis itu.

13.3. PERUNTUKAN PENGECUALIAN

Dengan syarat sentiasanya bahawa tanpa menghiraukan apa-apa yang disebut dalam Perjanjian ini, Tuan Tanah tidak akan bertanggungjawab sama ada kepada Penyewa atau lain-lain orang dan Penyewa pula tidak berhak menuntut apa-apa daripada Tuan Tanah sekiranya berlaku apa-apa gangguan kepada mana-mana kemudahan yang diperuntukkan di bawah Perjanjian ini atas sebab keperluan untuk memperbaiki atau menyenggara pemasangan-pemasangan atau peralatan-peralatan atau kerosakan kepadanya atau kemusnahannya yang disebabkan oleh kebakaran, banjir, taufan, bencana alam atau sebab-sebab lain yang di luar kawalan Tuan Tanah atau kekurangan bekalan minyak, bahan-bahan, pekerja atau air.

13.4. PERBUATAN PEKERJA-PEKERJA DAN EJEN-EJEN PENYEWA

Untuk tujuan perlaksanaan Perjanjian ini, apa-apa perbuatan kemungkiran serta/atau peninggalan oleh pekerja-pekerja atau ejen-ejen Penyewa akan dianggap sebagai perbuatan, kemungkiran, serta/atau peninggalan di pihak Penyewa.

14.5. PENEPIAN

Penerimaan sewaan seperti yang disebut dalam Perjanjian ini oleh Tuan Tanah tidak boleh dianggap sebagai satu penepian oleh Tuan Tanah terhadap hak Tuan Tanah untuk mengambil tindakan terhadap Penyewa tentang mana-mana kemungkiran syarat-syarat atau waad-waad oleh Penyewa di bawah Perjanjian ini dan apa-apa turutan yang diberikan oleh Tuan Tanah tidak boleh dianggap sebagai satu penepian

atau memprejudiskan hak-hak Tuan Tanah seperti yang terkandung dalam Perjanjian ini.

14.6. **MASA SEBAGAI PATI KEPADA PERJANJIAN**

Masa di mana-mana disebut dalam Perjanjian ini adalah merupakan inti pati kepada Perjanjian ini.

14.7. **KOS DUTI SETEM**

Penyewa akan menanggung kos guaman bagi peguamnya serta duti setem bagi Perjanjian ini dan lain-lain perbelanjaan/kos sampingan (jika ada) manakala Tuan Tanah pula akan menanggung kos guaman bagi peguamnya.

14.8. **NOTIS**

Apa-apa notis yang perlu diberi atau diserahkan oleh mana-mana pihak di bawah Perjanjian ini hendaklah secara bertulis dan hendaklah dihantar melalui pos berdaftar, faksimili atau serahan kendiri dengan dialamatkan kepada pihak yang satu lagi pada alamat yang selepas daripada ini diberikan ataupun lain-lain alamat sebagaimana yang akan dimaklumkan secara bertulis oleh pihak yang berkenaan dari semasa ke semasa. Bukti penghantaran notis tersebut dianggap bukti penerimaan:

- (a) Jika dihantar melalui pos berdaftar, pada hari ketiga (3) notis tersebut diposkan;
- (b) Jika dihantar melalui faksimili, semasa mesin transmisi pengirim menunjukkan pengesahan laporan bahawa penerima telah menerima transmisi tersebut; dan
- (c) Jika dihantar secara serahan kendiri, pada ketika penghantaran dan diakui terima.

14.9. **ALAMAT TUAN TANAH DAN PENYEWA**

TUAN TANAH

Seperti yang dinyatakan dalam **Seksyen 1 Jadual Kedua**

PENYEWA

Seperti yang dinyatakan dalam **Seksyen 2 Jadual Kedua**

14.10. **PENUKARAN ALAMAT**

Penyewa hendaklah memberitahu Tuan Tanah secara bertulis dalam tempoh tiga puluh (30) hari sebelum berlakunya pertukaran alamatnya.

14.11. PENGUATKUASAAN TERHADAP PENGGANTI

Perjanjian ini hendaklah mengikat ejen-ejen, wasi-wasi, pentadbir-pentadbir, pengganti-pengganti pindahmilik Tuan Tanah dan Penyewa.

14.12 PINDAAN

Sebarang pindaan, tambahan atau perubahan kepada Perjanjian ini hendaklah dibuat secara bertulis dan dipersetujui oleh kedua-dua pihak.

14.13 UNDANG-UNDANG

Perjanjian ini hendaklah dalam segala hal ditadbir dan ditentukan serta ditafsirkan menurut undang-undang yang berkuat kuasa di Malaysia.

Ruangan di bawah sengaja dibiarkan kosong

PADA MENYAKSIKAN HAK DI ATAS, pihak-pihak dalam Perjanjian ini telah menurunkan tandatangan mereka pada hari dan tahun seperti yang mula-mula tertulis di atas.

Ditandatangani oleh **TUAN TANAH**

Nama:)
Jawatan Rasmi:)
No. Kad Pengenalan:)
untuk dan bagi pihak)
PERBADANAN ASET KERETAPI)

Di hadapan (SAKSI)

Nama:).
Jawatan Rasmi:)
No. Kad Pengenalan:)

Ditandatangani oleh **PENYEWA**

Nama:)
No. Kad Pengenalan:)
Jawatan Rasmi:)
untuk dan bagi pihak)
<NAMA SYARIKAT>)
No. syarikat:)

Di hadapan (saksi)

Nama:)
No. Kad Pengenalan:)
Jawatan Rasmi:)

JADUAL PERTAMA

(Hendaklah dikira sebagai sebahagian penting perjanjian ini)

SEKSYEN	PERKARA	BUTIRAN
1.	Butir-Butir Penyewa	<nama & alamat syarikat/individu> No. Syarikat:
2.	Lokasi Penyewaan	
3.	Keluasan Premis Demis	
4.	Tujuan Penyewaan	
5.	No. Rujukan Surat Setuju Terima	
6.	Tarikh Surat Setuju Terima	
7.	Tempoh Penyewaan	Tiga (3) tahun
8.	(a) Wang Pendahuluan	Ringgit Malaysia.....(RMXX.XX) bersamaan dua (2) bulan kadar Sewa Bulanan
	(b) Sewa Bulanan	RM sebulan.
9.	Tarikh Kuat Kuasa Bayaran Sewa Bulanan	
10.	Wang Deposit	RM 300.00 (1 bulan kadar sewa)

JADUAL KEDUA

(Hendaklah dikira sebagai sebahagian penting perjanjian ini)

SEKSYEN	PERKARA	BUTIRAN
1.	Alamat Tuan Tanah	<p>Pengurus Besar Perbadanan Aset Keretapi Level 16, IOI City Tower 2 Lebuh IRC IOI Resort City 62502 Putrajaya, Sepang Selangor Darul Ehsan.</p> <p>No. Telefon: 03-8939 0200 No. Faks: 03-8939 0222</p>
2.	Alamat Penyewa	<p>No. Telefon : No. Faks : </p>

LAMPIRAN 1

(Surat Tawaran/Surat Setuju Terima dan lain-lain)

LAMPIRAN 2

(Pelan Premis Demis/Lokasi)